

Гермүд тосхгдджана

„Приозерный“ совхоз деер ода 50 гар хальмг өрк-бүл нүүдж ирцхәсн бәәнә. Эдн урднь Цагъан-Нурин сельсоветин медлд бәәсн улс. Эн бәәрни улсиг дахад Зургъана, Ханатин нань чигн советмүдт урднь бүүрлдж бәәсн улс ирцхәджәнә.

Мана совхоз ик өнр-өргн газр уста, мал-гертә совхоз. Шин көдлмшчнр улс, нег үлү хальмгуд урд цагт эн газр эзлдж йовсн, малин көдлмшт ик дамшлгъта, чадмг улс, ик кергтә. Эдн ирәд, мадн дотр орад көдлцхәхлә, мана совхозин эдл-аху улм шулугъар уралан делгрдж өсхнь лавта.

Совхозин директор үр Д.С. Иванов нүүдж ирцхәджәх хальмгудиг ик килмдштә кевәр тосджана. Эднд кергтә тоотиг торвр угагъар өгнә, некринь оньган өгч хәләнә. Долан шин сборн гер совхоз адгъдж хулддж авб. Гер болгънднь дөрвәд бүл багтхмн. Шишлнъ тосхлтин бригад бүрдәгъад, адгъмтагъар тосхджана. Дөрвн геринь дуусад, хальмгудиг орулчкв, наадкинь даруд дуусхмн.

Ирцхәсн хальмгуд ода цугтан көдлмшт орулгдцхав, шин гермүд тосхгдтл бәәцхәх бәәртә.

К. Богомоллов.